



Domat/Ems, ils 16 da zercladur 2019

COMMUNICAZIUN A LAS MEDIAS

Tge bel! Bunamain 14'000 persunas intgantadas han visità l'EMS-CHEMIE il di da las portas avertas

La sonda passada ha l'EMS-CHEMIE avert sias portas per la publicitad e la gliעד è vegnida en rotschas. Da temperaturas da stad han 13'800 visitadras e visitaders sco era var 150 giasts da l'economia e politica guardà cun mirveglias il svilup ed ils stabiliments da produenziun da la pli gronda patruna e scoladra d'emprendistas e d'emprendists en il Grischun ed èn sfunsads en il mund fascinant dal material sintetic spezial. Ensemen cun las numerusas attracziuns, il program da tribuna captivant e la purschida culinarica generusa, messa a disposiziun da GastroGraubünden, ha pitschen e grond giudì in di da bellezza sin l'entir areal da la fabrica!

Gia 45 minutas avant l'avertura uffiziala èn las visitadras ed ils visitaders stads en colonna davant l'entrada, nua ch'ils sunatibas da l'ensemble Engiadina, la Musica da Domat ed ils tamburs da Domat/Ems han fatg il bainvegni. La gliעד è vegnida en massas durant l'entir di.

Attracziuns sin l'areal da la fabrica

Cun grond interess han las visitadras ed ils visitaders fatg il gir da bundant 1,5 uras tras ils stabiliments. Suent in curt viadi tras ils 83 onns da l'EMS han els admirà sin 1'500 meters quadrat passa 3'000 applicaziuns innovativas da material sintetic spezial da l'EMS – da cumponentas per motors d'autos che supportan temperaturas extremas ad elements ultralevs per velos fin al roboter multimedial «Robi». Dapertut chatt'ins material sintetic dal Grischun! La guida ha cuntinuà tras il center da svilup modernischem da l'EMS, sperasvi a staziuns da stgargiar materias primas, per lung da numerus conducts, tras vasts indrizzs da produenziun e d'emballascha fin al magazin a regals auts – in dals trais ils pli gronds en l'entir mund – danunder ch'ils materials sintetics da l'EMS vegnan tramess en tut ils pajais pussaivels.

Infurmaziuns sorprendentas

Ultra da quai èn ins vegnì a savair da tuttas sorts fatgs ed aspects novs davart l'interpresa da tradiziun innovativa. Savevas Vus che l'EMS investescha mintg'onn 15 milliuns francs en la protecziun da l'ambient e la segirtad e ch'ella ha reduci il consum d'energia per bunamain 50% dapi il 2001? U ch'ils materials sintetics da l'EMS èn mo mez uschè grevs, ma exact tuttina robusts sco metal e ch'ins po reciclar els fin 10 giadas? U ch'ins emplaina en la producziun da l'EMS mintg'ura 400 satgs cun granulats da material sintetic che vegnan transportads a Rotterdam cun la viafier e da là cun il bastiment en l'Asia? Betg da smirvegliar che collavuraturas e collavuratur ed emprendistas ed emprendists da l'EMS han preschentà «lur» piazza da lavur plain superbia e raquintà cun plaschair da lur incumbensas multifaras e scolaziuns modernas.

Attracziuns per pitschen e grond

Igl ha dà blier da vesair: ils pumpiers da l'Ems n'han betg mo preschentà lur vehichels da stizzar e lur equipments supermoderns, mabain han era gist mussà lur inschign durant ina show da fiu impressiunanta. La show da chauns simpatica n'ha betg mo fascinà ils possessurs da chauns ed il «Mungga-Trail» (ina rudlera gigantesca cun ina lunghezza da passa 120 meters e nundumbraivlas stortas, loopings ed indrizs per auzar las cullas – sviluppada da las emprendistas e dals emprendists da l'EMS aposta per quest di) n'ha betg mo intgantà ils uffants. Autras attracziuns èn era stadas la roda panoramica nostalgica che ha purschì ina vista sur l'areal da la fabrica sco er il gir interessant tras l'entira fabrica da l'EMS.

Divertiment grondius da la regiun per la regiun

Tenor il motto «da la regiun per la regiun» han ins divertì las visitadras ed ils visitaders sin la gronda piazza da festa a moda variada cun producziuns da tut il Grischun: cun sia vusch plain power ha Vanessa T., la giuvna da 15 onns oriunda da Küblis, fatg batter pli spert ils cors da las visitadras e dals visitaders. La gruppa da costums da Glion e conturn ha fatg revive cun ses costums da tuttas colurs e sauts populars plain temperament in toc tradiziun grischuna stgetta. Estis Linedancers da Lai e steel4ever, la band da steeldrums da Tavau, han schlargià il spectrum musical e procurà per ina buna atmosfera. Era la prominenz n'ha betg mancà: la pli auta Grischuna, la presidenta dal Cussegl grond Tina Gartmann-Albin, il president da la regenza Jon Domenic Parolini ed il cusseglier guvernativ Mario Cavigelli sco er il president communal da Domat Erich Kohler èn sa mesirads en ina concorrenza amicabla da stimar pais cun l'anteriur cusseglier federal ed il patrun d'onur da l'EMS Christoph Blocher, il president dal cussegl da fundaziun da l'EMS Ulf Berg e la cussegliera naziunala grischuna e scheffa da l'EMS Magdalena Martullo. Cun umor e

bler scharm han ils enconuschents moderaturs Sven Epiney ed Annina Campell manà tut il di tras il program multifar.

EMS fa appetit

Er areguard l'aspect culinaric è il Grischun stà en il center: GastroGraubünden ensemen cun passa 30 furniturs ed uniuns grischunas e cun sustegn da passa 200 gidantras e gidanters han procurà per il bainstar da las visitadras ed dals visitaders. La liongia da brassar spezialmain savurusa «Bündner Puurachalb-Bratwurst» da charn-vadè biologica dal Grischun ha persvadì giuven e vegl. Ils uffants han già grond plaschair da las bunas sorts da glatsch da «Glatsch Balnot» e da «Filisurer Glacé» da la Val d'Alvra. A la fiera da purs han ins pudì degustar nundumbraivlas delicatessas da tut il chantun – da la Surselva fin en la Val Müstair. Las cifras da catering mussan a moda impressiunanta ch'il program varià ha fatg fom e said e che la purschida culinarica ha chattà buna accoglientscha: 12'000 liongias brassadas, 8'000 purziuns glatsch e 15'000 liters bavrondas.

«Jau hai nunditg plaschair che tants han visità nus a chaschun da noss di da las portas avertas. Tut las collavuraturas e tut ils collavuraturs sco era tut las gidantras e tut ils gidanters han contribuì al grond success ed jau engraziel fitg a finadin per ses engaschi. Jau ma legrel gia sin il proxim di da las portas avertas!», surri Magdalena Martullo che traglischia la sonda suentermezdi. «Tgi sa, forsa ch'i na dura betg puspè passa 10 onns ...!»

Cifras e fatgs

Dumber da visitadras e visitaders: 13'800

Dumber da liongias: 12'000

Dumber da tastginas da verduras: 2'500

Dumber da bavrondas: 15'000 liters

Dumber da purziuns glatsch: 8'000

Dumber da giradas cun la roda panoramica: 6'500

Dumber da girs tras la fabrica: 5'400

* * * * *

Fotos:

15 fotografias d'auta resoluziun pon ins telechargiar via questa colliaziun:

www.ems-group.com/ftp/Kommunikation/EMS-TdoT-Fotos.zip

Festa populara al di da las portas avertas da l'EMS-CHEMIE:



